

# Aruba tin mester di un Ritz Carlton? ..... no!



**VARIOS** mandatario den e gobernacion anterior tabata pretende cu Un Ritz Carlton na Aruba lo realza nos producto. Pero esaki absolutamente no ta berdad. Quizas un Ritz Carlton lo por realza nos “producto hotelero” pero definitivamente no e ‘producto Aruba’ en general, cu ta cubri e area di Westpunt te Punta Basora.

Un Ritz Carlton na Aruba NO ta drecha nos camindanan .....

Un Ritz Carlton na Aruba NO ta drecha servicio tur caminda na Aruba ....

Un Ritz Carlton na Aruba NO ta drecha nos situacion di trafico .....

Un Ritz Carlton na Aruba NO ta resolve nos problema cu adictonan ambulante .....

Y asina nos por sigui .....

Berdad ta cu Ritz Carlton ta un producto riba su mes di calidad halto, pero esey no kier men cu un resort asina na Aruba lo realza e producto turistico cu yama Aruba.

Nos por bay riba e website di Ritz Carlton y nos por mira cu nos mes wowonan cu e tarifanan pa camber di e cadena aki NO ta varia mucho di e tarifanan cu varios di nos hotelnan existente ya ta haya pa nan cambenan.

Pesey nos ta puntra: Aruba mester di un Ritz Carlton? Y e con-

testa ta keda un NO rotundo, specialmente si Ritz Carlton mester kita un patrimonio di pueblo – e beach cu nan kier – pa realiza nan proyecto.

Den nos concepto e beach aki (un di e ultimo pida nan na Palm Beach) y tambe e beach tereno di Bushiri Beach Resort mester keda pa pueblo. Cu otro palabra Bushiri mester pasa den gara di bulldozer y laga e lugar ey pa pueblo – no desaroya ningun proyecto di hotel aki.

Otro pregunta ta: Aruba lo beneficia di un presencia di un Ritz Carlton? E contesta aki ta afirmativo, semper y cuando esey no kier men cu mester traha mas camber.

Bill Marriott tin varios hotel na Aruba den e area caminda nan kier traha un Ritz Carlton.

Nan a informa gobierno cu nan no ta interesa den compra un hotel existente pa contrui un Ritz Carlton. E ora nos pregunta ta bira: Pakico Bill Marriott no ta converti un di su hotelnan cu ya e tin den e area ey den un Ritz Carlton? Pakico e ta asina empeña pa kita un di e patrimonionan di nos pueblo, mientras cu e mes tin edificio cu e por converti den un Ritz Carlton?

Nos ta kere cu pueblo mester cuminsa protesta contra e proyecto aki, ya cu e ta un proyecto cu sigur 26 mil y pico habitante a vota CONTRA.


Pa un maniobra gubernamental – sin menciona cual gobierno –

e tereno aki a cay den man di un grupo Venezolano cu kier desaroya un Ritz Carlton cueste loke cueste sin importa nan kico e propio pueblo di Aruba ta opina di henter e asunto aki. E tereno aki a wordo otorga CONTRA interes general di pueblo di Aruba. Si Ritz Carlton wordo construi riba e tereno aki, esaki tambe ta CONTRA interes general di e pueblo di Aruba. Quizas nos pueblo mester bringa pa su interes wordo respetal?

Nos no por keda man cruza y wak con dos grupo di stranhero ta bin trapa riba nos derechonan sin tene cuenta cu e interes GENERAL di nos isla. Bill Marriott mester converti un di su propio edificionan den un Ritz Carlton (cu asina si ta bonbini pa nos), y e tereno di e desaroyadornan ey mester wordo “onteigend” pa e sigui sirbi interes GENERAL di nos isla.

DANKI  
PA YAMA

E celular aki  
ta dibo si  
bo tip  
conducí na  
un articulo  
exclusivo



HOTLINE  
733-8477